



DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Jovis vigesima
mensis Martii, anno Domini M. DCC. LV.*

M. FRANCISCO-FELICITATE COCHU,
Doctore Medico, Præside.

An à simplici parcoque victu corpus sanum & animus expeditus?

I.



QUANTUM sit mortis sub vitæ nomine, docent quotidianæ solidorum & fluidorum jacturæ, quibus citò labetur machina, nisi ruenti stomacho, & cadentibus cum ipso venis, partibusque corporis omnibus, novæ in dies accedant futurae. In eam rem Natura nobis infert cibi potûsque desiderium; illud, famem; hoc, sitis est. Cibo sarcimus quidquid solidioris substantiæ excidit; potu, quidquid humidioris. Sed ut esculentorum ac potulentorum

A

vis est, quam nulla res æquet, ac in amborum usu variè sæpiùsque delinquitur; ita summi est ad vitam momenti rectè instituta vescendi ratio, sine quâ nihil unquam auspucato geras, quâ solâ infirmioribus vitam in multos annos produces; nec rarò velut ariete immaniores morbos præter omnium expectationem elidas. Prorsus ei qui corpore & animo perdiù valere cupiat, cum multa quæ ad victum pertinent, retinenda: tum maximè quæ cuiusque cibi potùsque sint vires atque discrimina; quis habendus utriusque modus, quæ adhibenda copia?

I I.

CIBUM potumque laudabilem à vitioso discreturus, non omni utatur quo populus; fugiat aridum & salsum quo minuitur corpus. Certè quod acris, alieni, aut turbidi quidpiam in se continet, quamlibet feliciter decoquatur, quas attinget partes, suâ istâ imbuet, quam mordicus retinet, prævitae. Removendum etiam quod est concoctu pertinax, quod tardi transitus, quod levius est eâque indole, ut citissimè coquatur, & corrumpatur, in iis præsertim quibus calor igneus est. Et illud videndum ne quæ apponuntur, pretio magis, quàm utilitate æstimentur: planè, quo cibus simplicior, purior, & parabilior; hoc præstantior; si quis emendationis ac mixturæ indigeat, ea sic concilietur, ut non solùm palato, sed etiam ventriculo, utili & gratâ fucci temperatione commendetur. Ne ingenio luxuriam adjuves, neve in gulæ irritamentum, cibo, species, aromata; rei optimæ, pessimam rem adjungas. Pulchrè suis rationibus providet, qui ejurat obsœnia, salsamenta, bellaria, crustula, tubera, fungos & blanda alia venena, quæ alliciunt veluti præstigiis captam appetentiam: qui sœdas horridasque escas, legumina, siliquas, hillas, fumo duratas carnes, quibuscum acrior pugna ineunda est, nunquam degustat: parcè vel lectissimas, fame scilicet, non luxu impulsus: parçissimè vinum, quod siccat & irritat vitalia, placido aquæ humore melius proluenda,

I I I.

NON minoris interest quanto, quàm quo quisque pascatur alimento. Illius in utramque partem magna omninò vis. Namque satietate nimia, corpus cruditate, morborum ferè omnium parente dissilit: & eorum qui se inedia macerant, exta senescunt celerius: hujus tamen quàm istius longè leviora sunt delicta: illa nunquam utilis; hæc, sæpius. Modum cibariorum nemo facillè definiat; quod eorum, veluti corporum, dispar sit penitus ratio, non semper famis, sitisque sedatione circumscribenda. Bona tamen natura quantum appetit, tantum concoquere plerumque solet. Famem facilius fert adolescens, quàm puer; deses, quàm exercitatus; in densò quàm in tenui cœlo; hieme quàm æstate; qui semel, quàm qui esse bis die solet. Robustis liberius comedere licet; iis verò qui imbecillo donantur stomacho, quo in numero ferè sunt civilis literatæque vitæ cultores, victus ratio diligentius servanda; ut quod ingenii labor corpori detrahit, cura restituat. Refert

etiam sit-ne firmum, an leve; stabile, an fugax alimentum. De mensâ igitur cape quantum debes, non quantum cupis; propterea ne falsa inter gaudia rapiaris extra metas necessitatis? Itane verò angustum, & conchylii more uni formæ mancipatum vitæ genus semper tenendum est, ut liberali amicorum imitationi interesse nefas sit? imò tanquam in acie, cum voluptariis rebus congregiendum; ut ventre minùs, quàm animo, conviva, adversùs eas, non tam fugâ, quàm constanti præsentia tutus; explicatam hilaritatem vitæ molestiis interponas, ut refoto ac reconcinnato animo, quid in ipso est frigida tristitiæ, diluas.

I V.

AD vitam præstantiorem, quæ corporis animique pace ac vigore continetur, facilis est via, si bonis avibus ineatur. Ejus pars magna est venter docilis, benè moratus, modicâ salubrique escâ placabilis. Epulis se refecere præceptus est ad morbum gradus: quippe gravata viscera, molem quâ premuntur, malè conficiunt; ut indè pestifera coacervetur illuvies, cujus virus vel in ipsum se fundit animum. Contra, qui tenuem sed nitidam mensam instruit (faciles enim fugere munditias, cibisque vesci contemptissimis absurdum esset) difficilè dictu magisne bonæ valetudini, an bonæ menti consulat? Nempe decoctis strenuè & absque negotio assumptis, detrimenta, quæ ex his fiunt, statim seposita, partium quibus id curæ est, robore, quâ solent viâ trudentur foràs; defæcior succus vasorum penitissimorum recessus expeditè permeat: Nervi, partesque reliquæ, jugi, vivifici roris, sanguinisque intaminati appulsu vigent, roburque citra molem colligunt; relucet in ore, vultu, totoque habitu, eximius quidam nitor, senii nescius: sit corpus universum ad munia incorruptè obeunda habile, promptum, & alacre; id, ne senectus quidem ipsa, frangit; adest denique firma, hilaris, vix ullis morbis violanda valetudo.

V.

NON solum longioris vitæ, sed mentis erectioris, sapientiæ, prudentiæque consiliorum author est & quasi parens tenuis cautulusque victus: hac arte, nullo nidore, nullâ tetrâ purgamentorum contagione inficitur cerebri substantia, clarioris tenuiorisque sanguinis accessione sic temperata, ut qui inde ducuntur purgatissimi spiritus, ipsi totique corpori colluceant. Oculi puro lumine vigent; liquidus est ac penetrabilis auditus; pedes certa imprimunt vestigia: mens ipsa in suâ regiâ, nullo sensuum errore tracta excipit germana rerum simulacra, quorum ope res clariùs cernit, ac dijudicat, acceptorum tenacissima. Dum autem ipsa sibi vacat, assiduâ rerum meditatione, sese exacuit, magis ac magis enitescit, ut valeat ipsa suis viribus & velut è sublimi solio, sua singulis partibus scitissimè

4

describat officia. Sed & quia summum in illas obtinet imperium, pacem cuncta tenent, silent aversa à ratione, animi commotiones; quæ surgit dapibus incensa libido, ventris castigatione friget. Ne plura: sobrii & à vino integri, vel ubi se quieti tradiderunt, nec jam suis uti possunt membris ac sensibus, incidunt in visa jucunda, & tranquilla; quemadmodum helluones in perturbata, impura & tetra.

Ergò à simplici parcoque victu corpus sanum & animus expeditus.

Proponerebat Parisiis GUIDO DANIEL DESPATUREAUX;
Bituricus, Doctor Medicus Remensis; nec non Saluberrimæ Facultatis
Medicinæ Baccalaureus, A. R. S. H. 1755,
A SEXTA AD MERIDIEM,